

नमो नमो निम्नल दंतणस्त  
पंचम गणधर श्री सुधर्मास्वामिने नमः

## २३ वृष्णिदशा-उपाङ्गसूत्रम्

सटीकं

(द्वादशमं उपाङ्गम्)

(मूलसूत्रम् + चंद्रसूरि विरचिता वृत्तिः)

(अध्ययन-१ 'निबधः')

मू. (१) जइ णं भंते उक्खेवओ० उवंगाणं चउत्थस्स वग्गस्स पुप्फचूलाणं अयमड्ढे पन्नत्ते, पंचमस्सणं भंते । वग्गस्स उवंगाणं वह्निदसाणं समणेणं भगवया जाव संपत्तेणं के अड्ढे पन्नत्ते ? एवं खलु जंबू ! समणेणं भगवया महावीरेणं जाव दुवालस अज्झयणा पन्नत्ता, तं जहा—

मू. (२) निसद्वे १ माअनि २ वह ३ वह ४ पगता ५ जुत्ती ६ दसरहे ७ दहरहे ८ य ।

महाधनू ९ सत्तधनू १० दसधनू ११ नामे सयधनु १२ य ॥

बु. पञ्चमवर्गे वह्निदशाभिधाने द्वादशाध्ययनानि प्रज्ञप्तानि निसद्वे इत्यादीनि ।

मू. (३) जइ णं भंते ! समणेणं जाव दुवालस अज्झयणा पन्नत्ता, पढमस्स णं भंते ! उक्खेवओ । एवं खलु जंबू ! तेणं कालेणं २ बारसई नामं नगरी होत्था दुवालसजोयणायामा जाव पच्चवखं देवलोयभूया पासादीया दरिसणिआ अभिरुवा पडिरुवा ।

तीसे णं बारवईए नगरीए बहिया उत्तरपुरच्छिमे दिसीभाए एत्थ णं रेवए नाम पव्वए होत्था, तुंगे गगनतलमणुलिहंतसिहरे नानाविहरुवखगुच्छगुम्पलतावल्लीपरिगताभिरामे हंसमिय-मयूरकोचसारसकागमयणसालाकोइलकुलोववेते तडकडगवियरउब्भरपउरे अच्छरगण-देवसंधविआहरमिहुणसंनिचित्रे निव्वत्थणए दसारवरवीरपुरिसतेलोकबलवगाणं सोमे सुभए पियदंसणे सुरूवे पासादीए जाव पडिरुवे ।

तस्स णं रेवयगस्स पव्वयस्स अदूरसामंते एत्थ णं नंदनवने नामं उआणे होत्था, सव्वोउयपुप्फ जाव दरिसणिजे । तत्थ णं नंदनवने उआणे सुरप्पियस्स जक्खस्स जक्खायतणे होत्था चिराईए जाव बहुजनो आगम्म अट्ठेति सुरप्पियं जक्खाययणं । से णं सुरप्पिए जक्खाययणे एगेणं महता वनसंडेणं सव्वओ समंता संपरिक्खित्ते जहा पुत्रभदे जाव सिलावड्ढते ।

तत्थ णं बारवईए नयरीए कण्हे नामं वासुदेवे राया होत्था जाव पसासेमाणे विहरति । से णं तत्थ समुहविजयपामोक्खाणं दसण्हं दसाराणं, बलदेवपामोक्खाणं पंचण्हं महावीराणं, उगगसेन-पामोक्खाणं सोलसण्हं राईसाहस्सीणं, पजुन्नपामोक्खाणं अट्ठुड्ढाणं कुमारकोडीणं, संबपामोक्खाणं सट्ठीए दुदंतसाहस्सीणं, वीरसेनपामोक्खाणं एककीसाए वीरसाहस्सीणं, रुप्पिणिपामोक्खाणं सोलसण्हं देवीसाहस्सीणं, अनंगसेनापामोक्खाणं अनेगाणं गणियासाहस्सीणं, अन्नेसि च बहूणं

राईसर जाव सत्यवाहपभिरुं वयङ्गिरिसागरमेरागस्स दाहिणहभरहस्स आहवच्चं जाव विहरति ।

तत्थ णं बारवईए नयरीए बलदेवे नामं राया होत्था, महया जाव रअं पसासेमाणे विहरति तस्स णं बलदेवसस रन्नो रेवई नामं देवी होत्था सोमाला जाव विहरति । तते णं सा रेवती देवी अन्नदा कदाइ तंसि तारिसगंसि सयणिअंसि जाव सीहं सुमिणे पासित्ता णं०, एवं सुमिणदंसण-परिकहणं, कलातो जहा जहा महाबलस्स, पंनासतो दातो पन्नासरायकण्णगाणं एगदिवसेणं पाणिं० नवरं निसढे नामं जाव उप्पि पासादं विहरति । तेणं कालेणं २ अरहा अरिद्धनेमी आदिकरे दसधनूइ वण्णतो जाव समोसरिते, परिसा निग्गया ।

तते णं से कण्हे वासुदेवे इमीसे कहाए लद्धइ समणे हइतो एतो य कुडुंबियपुरिसे सहावेति २ एवं वदासी-खिप्पामेव तेवाणुप्पिया ! कहाए दुहन्माए सामुदानियं भेरिं तालेहि । तते णं से कुडुंबियपुरिसे जाव पडिसुणिता जेणेव सभाए सुहन्माए सामुदानिया भेरी तेणेव उवा० २ तं सामुदानियं भेरिं महता २ सद्देणं तालेति ।

तते णं तीसे सामुदानियाए भेरीए महता २ सद्देणं तालियाए समाणीए समुद्विजयपामोक्खा दस दसारा देवीओ उण भाणियव्वाओ जाव अनंगसेनापामोक्खा अनेगा गणिया सहस्सा अग्ने य बहवे राईसर जाव सत्यवाहपभितितो ण्हाया जाव पायच्छित्ता सव्वालंकारविभूसिया जहाविभवइहिसिक्कारसमुदएणं अप्पेगइया हयगया जाव पुरिसवगुरापरिक्खित्ता जेणेव-कण्हे वासुदेवे तेणेव उवा० २ करतल० कण्हं वासुदेवं जएणं विजएणं वद्धावेति ।

तते णं से कण्हे वासुदेवे कोडुंबियपुरिसे एवं वयासी-खिप्पामेव सो देवाणुप्पिया ! आभिसेकहत्थिं कप्पेह हयगयरहपवर जाव पञ्चप्पिणंति । तते णं से कण्हे वासुदेवे मअणधरे जाव दुरुढे अद्धमंगलगा जहा कूणिए सेयवारचामरेहि उद्धव्वमाणेहि २ समुद्विजयपामोक्खेहिं दसहिं दसारेहिं जाव सत्यवाहपभित्तीहिं सद्धिं संपरिचूडे सव्विह्वीए जाव रवेणं बारवई नगरिं मज्झं मज्झेणं सेसं जहा कूणिओ जाव पञ्चवासइ ।

तते णं तस्स निसढस्स कुमारस्स उप्पि पासायवरगयस्स तं महता जन सद्दं च जहा जमाली जाव धम्मं सोच्चा निसम्म वंदइ नमंसइ २ एवं वदासी-सद्दहामि णं भंते निग्गंथं पाययणं जहा चित्तो जाव सावगधम्मं पडिवज्जति २ पडिगते । तेणं कालेणं २ अरहा अरिद्धनेमिस्स अंतेवासी वरदत्ते नामं अनगारे उराले जाव विहरति । तते णं से वरदत्ते अनगारे निसढं कुमारं पासति २ जातसद्धे जाव पञ्चवासमाणे एवं वयासी-अहो णं भंते ! निसढे कुमारे इट्ठे इट्ठस्सवे कंते कंतस्सवे एवं पिए मणुअए मणामे मणामस्सवे सोमे सोमस्सवे पियदंसणे सुरुस्सवे ।

निसढे णं भंते ! कुमारे णं अयमेयारूवे माणुयइही किणा लद्धा किणा पत्ता पुच्छ जहा सूरियाभस्स, एवं खलु वरदत्ता ! तेणं कालेणं २ इहेव जंबुद्वीवे २ भारहे वासे रोहीडए नामं नगरे होत्था, रिद्ध, मेहवन्ने उज्जाणे मणिदत्तस्स जवखस्स जवखाययणे । तत्थ णं रोहीडए नगरे महव्वले नामं राया, पउमावई नामं देवी, अन्नया कदाइ तंसि तारिसगंसि सयणिअंसि सीहं सुमिणे, एवं जम्मणं भाणियव्वं जहा महव्वस्स, नवरं वीरंगतो नामं वत्तीसतो दातो वत्तासाए रायवरकण्णगाणं पाणिं जाव ओगिजमाणे २ पाउसवरिसारत्तरसरयहेमंतगिह्वसंतं छप्पि उऊ जहाविभवे समणे

२ इह सद जाव विहरति ।

तेणं कालेणं २ सिद्धत्वा नाम आयरिया जातेसंपन्ना जहा कंसी, नवरं बहुसुया बहुपरिवारा  
बेणेव राहीइए नगरे जेणेव मेहवन्ने उज्जाणे जेणेव मणिदत्तस्स जक्खस्स जक्खाययणे तेणेव  
उवागते, अहापडिरुवं जाव विहरति, परिसा निग्गया । तते णं तस्स वारंगतस्स कुमारस्स उप्पि  
पासायवरगतस्स त महता जनसहं च जहा जमाली निग्गतो धम्मं सोच्चा जं नवरं देवाणुप्पिया !  
अम्मापियरो आपुच्छामि जहा जमाली तहेव निवखंतो जाव अनगारे जाते जाव गुत्तबंभयारी ।

तते णं से वीरंगते अनगारे सिद्धत्वाणं आयरियाणं अंतिए सामाइयमाइयाइं जाव एकारस  
अंगाइं अहिअति २ बहुइं जाव चउत्थ जाव अप्पाणं भावेमाणे बहुपडिपुन्नाइं पणयालीसवासाइं  
सामणपरियायं पाउणत्ता दोमासियाए संलेहणाए अत्ताणं झूसित्ता सवीसं भत्तसयं अणसणाए  
छेदित्ता आलोइय समाहिपत्ते कालमासे कालं किच्चा बंभलोए कप्पे मनोरमे विमाणे देवत्ताए  
उववन्ने । तत्थ णं अत्येगइयाणं देवाणं दससागरोवमाइं ठिई पन्नत्ता । तत्थ णं वीरंगयस्स देवस्स  
दससागरोवमाइं ठिई पन्नत्ता । से णं वीरंगते देवे तातो देवलोगाओ आउक्खएणं जाव अनंतरं  
थयं चइत्ता इहेव बारवईए नयरीए बलदेवस्स रत्तो रेचईए देवीए कुच्छिसि पुत्तत्ताए उववन्ने ।

तते णं सा रेवती देवी तंसि तारिसगंसि सयणिअंसि सुमिणदंसणं जाव उप्पि पासायवरगते  
विहरति । तं एवं खलु वरदत्ता ! निसढेणं कुमारेणं अयमेयारूवे ओराले मणुयइही लद्धा ३ । पभू  
णं भंते ! निसढे कुमारे देवाणुप्पियाणं अंतिए जाव पव्वइत्तए ? हंता पभू ! से एवं भंते भंते ! इइ  
वरदत्ते अनगारे जाव अप्पाणं भावेमाणे विहरति । तते णं अरहा अरिद्धनेमी अन्नदा कदाइ  
बारवतीओ नगरीओ जाव बहिया जणवय विहारं विहरति, निसढे कुमारे समणोवासए जाए  
अभिगतजीवाजीवे जाव विहरति । तते णं से निसढे कुमारे अण्णया कयाइ जेणेव पोसहसाला  
तेणेव उवा० २ जाव दब्भसंधारोवगते विहरति ।

तते णं तस्स निसढस्स कुमारस्स पुव्वरत्तावरत्त० धम्मजागरियं जागरमाणस्स इमेयारूवे  
अज्झत्थिए०—धन्ना णं ते गामागर जाव संनिवेसा जत्थ णं अरहा अरिद्धनेमी विहरति, धन्ना णं ते  
राईसर जाव सत्थयाहप्पभित्तिओ जे णं अरिद्धनेमी बंदति नमंसति जाव पज्जुवासति, जति णं  
अरहा अरिद्धनेमी पुव्वाणुपुव्वि नंदनवने विहरेज्जा तेणं अहं अरहं अरिद्धनेमिं वंदिज्जा जाव पज्जुवासति,  
जति णं अरहा अरिद्धनेमी पुव्वाणुपुव्वि नंदणवणे विहरेज्जा तेणं अहं अरहं अरिद्धनेमिं वंदिज्जा  
जाव पज्जुवासिज्जा ।

तते णं अरहा अरिद्धनेमी निसढस्स कुमारस्स अयमेयारूवं अज्झत्थियं जाव वियाणित्ता  
अट्टारसहिं समणसहस्सेहिं जाव नंदनवने उज्जाणे, परिसा निग्गया, तते णं निसढे कुमारे इमीसे  
कहाए लद्धे समणे हइ० चाउग्घट्टेणं आसरहेणं निग्गते, जहा जमाली, जाव अम्मापियरो  
आपुच्छित्ता पव्वयिते, अनगारे जाते जाव गुत्तबंभयारी ।

तते णं से निसढे अनगारे अरहतो अरिद्धनेमिस्स तहारुवाणं थेराणं अंतिए सामाइयमाइयाइं  
एकारस अंगाइं अहिअति २ बहुइं चउत्थछट्ट जाव विचित्तेहिं तवोकम्मेहिं अप्पाणं भावेमाणे  
बहुपडिपुन्नाइं नव वासाइं सामणपरियायं पाउणत्ति बायालीसं भत्ताइं अणसणाए छेदेति,  
आलोइयपडिक्कंते समाहिपत्ते आनुपुव्वीए कालगते । तते णं से वरदत्ते अनगारे निसढं अनगारं

कालगतं जाणिता जेणेव अरहा अरिद्विनेमो तेणेव उवा० २ जाव एवं वयासी—एवं खलु वेवाणुपियाणं अंतेवासी निसढे नामं अनगारे पगतिमद्दे जाव विणीए ।

से णं भंते ! निसढे अनगारे कालमासे कालं किञ्चा कहिं गते ? कहिं उववन्ने ? वरदत्तादि अरहा अरिद्विनेमी वरदत्तं अनगारं एवं वयासी—एवं लु वरदत्ता ममं अंतेवासी निसढे नामं अनगारे पगइमद्दे जाव विणीए ममं तहारुवाणं थेराणं अंतिए सामाइयमाइयाइं एक्कारस अंगाइं अहिअित्ता बहुपडिपुन्नाइं नव वासाइं सामण्णपरियागं पाउणिता बायालीसं भत्ताइं अणसणाए छेदेत्ता आलोइयपडिअंते समाहिपत्ते कालमासे कालं किञ्चा उहं चंदिमसूरियगहनक्खत्त-तारारुवाणं सोहम्मीसाण जाव अञ्जुते तिन्नि य अङ्गारसुत्तरे गेविअविमाणे याससत्ते वीतीवत्तिता सव्वडुसिद्धविमाणे देवत्ताए उववण्णे ।

तत्थ णं देवाणं तेत्तीसं सागरोवमाइं ठिई पन्नत्ता से णं भंते ! निसढे देवे तातो देवलोगाओ आउक्खएणं भवक्खएणं ठिइक्खएणं अनंतरं चयं चइत्ता कहिं गत्तिअिहिं ? कहिं उववत्तिहिं वरवत्ता ! इहेव जंबुदीवे २ महाविदेहे वासे उअ्राते नगरे विसुद्धपिइवंसे राकले पुत्तत्ताए पञ्चायाहिं । तते णं से उम्मुक्खालभावे विण्णयपरिणयमित्ते जीव्णगमणुप्पत्ते तहारुवाणं थेराणं अंतिए केवलबोहिं बुज्झित्ता अगाराओ अनगारियं पव्वअिहिं । से णं तत्थ अनगारे भविस्सति इरियासमिते जाव गुत्तवं भयारी ।

से णं तत्थ बहुइं चउत्थछट्ठमदसमदुवालसेहिं मासद्धमासखमणेहिं विचित्तेहिं तवोकम्मेहिं अप्पाणं भावेमाणे बहुइं वासाइं सामण्णपरियागं पाउणिस्सति २ मासियाए संलेहणाए अत्ताणं झूसिहिं २ सत्तिं मत्ताइं अणसणाए छेदिहिं । जस्सट्ठाए कीरति नग्गभावे मुंडभावे अण्हाणाए जाव अदंतवणए अचुत्तए अणोवाहणाए फलहसेआ कट्ठसेआ केसलोए बंभवेरवासे परघरपवेसे पिंडवाउलद्धाविलद्धे उद्धावया य गामकंटया अहियासिज्जति, तमहं आराहेति, आराहिता चरिमेहिं उस्सासनिस्सासेहिं सिज्झिहिं बुज्झिहिं जाव सव्वदुक्खाणं अंतं काहिं २ । एवं खलु जंबु ! समणेणं भगवया महा० जाव निक्खेवआ ।

बृ. प्रायः सर्वोऽपि सुगमः पञ्चमवर्गः, नवरं 'चिराईए'ति चिरः—चिरकाल आदिनिवेशो यस्य तच्चिरादिकम् । 'महय'ति 'महया हिमवंतमलयमंदरमहिंदसारे' इत्यादि ध्ययम्, तत्र महाहिमवदादयः पर्वतास्तद्वत्सारः प्रधानो यः ।

नगरनिगमसिद्धिसेणावइसत्थवाहपभित्तिओ । जे णं भगवंतं वंदति । तदनु नन्दनवने उद्याने भगवान् समवसुतः ।

बायालीस भत्ताइं ति दिनानि २१ परिहृत्यानशनया । 'निसढे ताओ देवलोगाओ आउक्खएणं'ति आयुर्वलिकनिर्जरणेन, 'भवक्खएणं'ति देवभवनिबन्धनभूतकर्मणां गत्यादीनां निर्जरणेन, स्थितिक्षयेण—आयुःकर्मणः स्थितेर्वेदनेन, 'अनंतरं चयं चइत्त'ति देवभवसंबन्धिनं चयं—शरीरं त्यक्त्वा, यद्वा च्यवनं कृत्वा क यास्यति ? गतोऽपि क्वोत्पत्स्यते ?

'सिज्झिहिं' सेत्स्यति निधितार्थतया, मोत्स्यते केवलालोकेन, मोक्ष्यते सकलकर्माशैः, परिनिर्वास्यति—स्वस्थो भविष्यति सकलकर्मकृतविकारविरहितया, तात्पर्यार्थमाह—सर्वदुःखानामन्तं करिष्यति ॥

**अध्ययनानि २....१२**

मू. (४) एवं सेसा वि एकारस अज्झयणा नेयव्वा संगहणी अनुसारेण अहीणमइरित्त एकारससु वि ॥

अध्ययनानि २...१२ समाप्तानि

(पंचमो वग्गोसम्मत्तो)

निरयावलियासुयखंधो सम्मत्तो । संमत्ताणि उवंगणि । निरयावलिया उवंगे णं एगो सुयखंधो पंच वग्गा पंचसु दिवसेसु उद्दिस्संति, तत्थ घउसु वग्गेसु दस दस उद्देसगा, पंचमवग्गे बारस उद्देसगा । निरयावलियासुयखंधो सम्मत्तो । निरयावलियाणंसुत्तं सम्मत्तं ॥

इति श्रीश्रीचन्द्रहसूरिविरचितं निरयावलिकाश्रुतस्कन्धविवरणं समाप्तमिति । श्रीरस्तु ॥

पुनि दीपरत्नसागरेण संशोभिता सम्पादिता वृष्णिदशाउपाङ्गसूत्रस्य

चन्द्रसूरि विरचिता टीका परिसमाप्ता ।

\*\*\*